Bergordnung

für

Schemnitz/ Banská Štiavnica

Sonntag Iudica

1513

Neu aufgenommen von Eva Jaschik Dresden 2023

auf der Grundlage der Bergordnung Schemnitz/ Banská Štiavnica

vom 13. März 1513
in
Das Stadt- und Bergrecht
von Banská Štiavnica / Schemnitz/

von Ilpo Tapani Piirainen

> Oulu 1986

Einleitung

Der Text zu diesem Stadt- und Bergrecht für *Schemnitz*, befand sich im Original auf einem Pergament und wurde von *Ilpo Tapani Piirainen als "Handschrift 3" bezeichnete.*

Nach einer Einleitung durch König *Vladislav II.* und einem Verweis auf die Entstehung dieser Ordnung unter König *Bela IV.*, folgte auch eine Einleitung König *Belas IV.*

Bis zum Paragraf 41 wurde das Stadtrecht von *Schemnitz* beschrieben. Die Paragrafen 42 bis 59 waren eine Wiederholung der *Schemnitzer Bergordnung* von 1466. Mit den Paragrafen 60 bis 68 wurden abschließend neun weitere Artikel hinzugefügt.

Präzisiert wurde in den neuen Artikeln das Verhalten bei Durchschlägen und die Rechte der einzelnen Gruben bei der Anschaarung von Gängen.

Weiteres Thema war das Vorgehen bei flach einfallenden Gängen, wenn diese in der Teufe auf ein fremdes Grubenfeld trafen.

Beim Vermessen des Erzganges sollten die zu verleihenden Lehen im Verlauf des Ganges ("krumm") vermessen werden.

Im Paragraf 68 wurden zudem die Rechte beim Durchschlag zweier Erbstollen miteinander erläutert.

Verwendet für diese Edition wurde die Veröffentlichung dieser Bergordnung in "Das Stadt- und Bergrecht von Banská Štiavnica / Schemnitz" von Ilpo Tapani Piirainen, herausgegeben 1986 in Oulu.

Die Auslassungen von Buchstaben im Wort im Originaltext wurden vom Autor *Ilpo Tapani Piirainen* ergänzt und in der jetzigen Veröffentlichung durch () kenntlich gemacht.

Für die Abschrift des gesamten Textes zeichnet *Eva Jaschik* verantwortlich. Bearbeitet, korrigiert und komplettiert wurden die Texte durch *Uwe Jaschik*.

Bergordnung

<u>Wir Wladislaus</u> von gots genaden Zue Hungern Beheim Dalmatian Croacien Ramen Seruien Gallicien Lodomirien Cumanien Bulgarien (etc.) Kunig Marggraue Zuo Merhern Hertzog zue luxemburg vnnd in Schlesien Marggraue zue Lawsitz (etc.) Bekennen vnnd thun kundt allermeinigklichen, das vor vns wegen vnnd in namen der Ersamen vnnser lieben getrewen Richter Rathmannen vnnd ganntzer gemain vnnser Statt Schebnitz Balthasar Sterkn statschreyber

daselbst erschinnen vnnd vns ein puech mit Iren Statrechten perckrechten darinnen artickelsweyß geschriben vnnd verzeichnent furgetragenn. Wie sie denn von vnnsernn vorfordren kunigen zue Hunngern erworbenn herbracht begabt vnnd begnadet sein Auch des förderlich ettwan von Kunig Bela loblicher gedächtnuss genedigklichenn bestett Confirmert vnnd beschert in beruelichem gebrawch gehabt vnnd besessen hinfurder dest sicherer gebrawchen möchten Vns darauff als Iren Erbherrenn vnd Khunig vndertheniges vleiss diemuetigklich angerueffenn gebeten Inen die selb ir Statgerechtigkayt perckrecht wie von alter herkomen vnd sye gehaltenn auff ein newes genedigklich Zu bestettigenn zue bekrefftigen vnnd zue confirmirenn geruerhtenn Wie den solchs alles hernach volget geschriben stet vnnd lawtet.

In dem Namen Der Heiliggen Drivaltikeit Amen Hienach volgent gemaine Statt vnnd perckrecht der Erbernn vnd loblichen Statt Schebnitz von etlichen Durchlewchtigestenn herren, herren vnd khunigen von Hunngern (etc.) denn gott genadig sei begabt vnnd begnadet vnd nochmallnn von dem Allerdurchlewchtigestenn Fursten vnd Herren Bela auch Khunig zue Hungerrn löblicher gedächtnuss auss besunndern gnaden der eegedachten Statt Schebnitz vnnd allenn Inwonern doselbenns zue merung vnd ewigem auffnemenn genedigklich bestatt vnnd Confirmiert hat obgestimbte Statt vnnd perckrecht vestiglich gepotenn stet vest vnnd vnzerbrochenn zehaltenn, do wider auch nit hanndelnn in khainn weg noch weyse.

Wir Bela Von Gottes genaden Zw Hunggernn Dalmatien Croacienn (etc.) Khunig verkhundenn allenn vnnd itzlichenn die disenn Gegentwurtigen brieff ansehenn horn oder lesenn, hail vnnd genad. Seindtemall das khunigklicher Maiestat woll antzimbt seines lanndes nuetz vnnd zuenemung fleyssigklich zuebewarenn So wellen wir vnnsernn getrewenn percklewtenn vnnserer statt Schebnitz vnndt anndernn vnnserenn perckhlewtenn In Vnnserm land zue Hunngern ein ewige Hutt machen vnnd ein beschirmung den dagenn die nw lebenn vnd denn die noch in geborn werden von vnnserm kunigklichem gewalt vnnd freyem Willenn Vnnd geben in vnnd verleihenn Recht vnnd freyheit als hernach geschribenn stett Die heyligenn kronn vnnd Irem nuetz woll fuegenn Vnnd frwmmen domit wir sye begnaden vnnd bestettigenn an alles widersprechenn ewigklichenn mit vnnserer Maiestat Alzo das khain Lanndtherr noch khain Edelmann noch keinn Ritter, noch khein Lanndrichter noch khain gehochter man geistlich noch weltlich die Zue vnnserm Reich gehoren keinen frevell noch gewalt begeenn Inn keiner vnnserer perkstettenn keinenn menschenn anlawffenn noch vahen Noch an keinem geschefft hinder an desselben Statrichters vrlawb vnnd seiner geschworen Vnnd auch ob ein perkman oder Burger gesessen sey, oder erb hab ausserhalb, oder inderhalb der Statt vber die soll khain lanndtrichter noch khain Ambtman gerichtes phlegen noch gewalt habenn Sunder ob ein Burger gegenn den anndernn icht zue klagen hat fur den Richterr vnnd fur dem gericht soll das geschehenn, Vnd soll sein recht suechenn, als annder lewtt. So wellen Wir auch vnnd gebieten, was der Richter von der statt, vnnd geschworenn Burgerr ordennt vnnd schaffenn das der gemain gutt ist vnnd nuetz, das die Statt vnzebrochenn bleib vnnd gehaltenn werd von allen lewten. So wollen wir awch vnnd gebieten vestiglich zubehaltenn. Ob ein man einen todschlag begieng oder grosse missetat So soll kein Lanndtrichter noch keiner vnnser ambtlewt keinen gewalt ann seinem guet, farund oder vnfarunnd begeen noch der Richter noch die geschworen von der Statt. Wie woll er doch schuldig vnnd vorfluchtig sey worden Sunder sein hawsfraw vnnd Ire Erben solln es besitzenn mit frid vnnd gemach.

§ 42

Wir geschwornnen von der Schebnitz von besunderlicher befelhung, vnnd gwnst des Allerdurchlewchtigisten Fursten vnd herren, herrn Bela kunigs zue Hungern (etc.) so wir aygentlich betrachtund gesetz haben, die gemaynen statt recht. Nue tzynnbt vns, vnnd ist notturfft zue beschaydenn vnnd zue setzen, die perckrecht, der aygenschafft nach irem wesen, wir hernoch erzellen wellen. So dem perg vnnd stollen, sollenn gemessen werden, noch lachternn vnd lehen. So ist zue wissen das das percklochter behelt vnnserer statt elln drey vnd syben lachter behalten ein lehen.

§ 43

<u>Nun setz wir zwm ersten</u> wie vnnd von wem man perckrecht enphahn soll, vnnd zue wellicher tzeyt. So ist zue wissen das der richter vnnd der rate, einer ytzlichenn pergstatt, hat zue setzen einen gesworenn pergkmaister. Vnd der soll seine sold haben von der kamer des kunigs. Auch so haben sy zue setzen, einen geswornen tayler, Nach der statt nwtz, als verr als sye vnversprochen lewtt sein.

§ 44

Alle pergkwerch, es sein schecht oder stollenn, die yemand ve(r)lihen werden von den gesworen vnnd dem pergkmayster, oder gegeben werden, vnder der statt Insigell, die sollen beleyben an alle widerred.

§ 45

Wo ein perg gefunden wirt, der nye entgennzt ist, oder ein stollnn wirt angenomen auff den mon genng oder ertzt finden, vnnd beweyst das mit dreyenn markhenn silber fur dem ratt der statt vnnd dem pergkmayster, der behelt das pergkrecht, auff yede seytten, dem gang nach vierdhalb lehen, vnnd das soll er bewernn mit seinen schächten, in das hanngund ein lehenn, vnnd das ligund ein lehen, Vnnd wenn man Im sein schecht auß gezaychent, die er pawen soll, darnnoch, so hat ein yderman recht zue pawen der da pawen will oder mag, auffzueslahenn scheyblige lehen. Alzo doch, das einer dem anndern weych ein lehenn, vnnd der erste, auffgeschlagen schacht, hat das lehen auff die anndern schecht Vnd ob ychte freyes entzwyschen wär, vnd ob ein tayll das selb gewun, mit schlegel vnnd mit eysenn, das gewynt Im nyemant ann den der Graff mit der

vberschar vnnd mit einem schacht, vnnd yedtlicher gemessener perg, in den syben lehen, soll von recht zue maysten drey schäch habenn, vnd In yetzlichenn lehen drey orter, vnnd in yetzlichem lehenschafft drey ortt, vnd man mag in furpaser nicht betzwingen. Wer aber pawt in einem stolln, der nicht erbhafftig ist, vnnd yetz fundt ertz oder genng die der moß werdt seindt, man sol im von der statt do er das ertz funden hatt messen fur sich, vier(d)halb lehen, vnd hindersich vierdthalbs, als oben gesprochen ist, alzo, ob er den stollen rechtlich entphangn hatt.

§ 46

<u>Ein berg oder ein stollnn</u>, die gemessen sind, vnnd darnach wust, vnd vnpawhafft gesehen werden, die soll man khunden offenlich sechs suntag, das die kumen, der die pergkwerch sindt gewesen. Ist oder das der sybent suntag furkhumbt, vnnd das man nyemandt do arbaytten findet, so haben die geschworn vnnd der pergkmayster frey zuvergeben das, wer do khumbt.

§ 47

Ein erbhafftiger stollnn behelt sein recht, Alzo ist das der, der den stolln pawt sein wasserseyg recht vnd beschaydentlichen auffurt vnnd sein liechtlöcher zue recht fertiget, vnnd in Iares frist an seiner stolwant eines lachters lang arbeyt, mit beweysung, so helt er den stolln mit allem rechten. Ist das ein berg den andern hindert, mit wassers nött, das swllen die gewercken dem gericht vnd dem pergkmayster, drey tag vestigklich khunt thuen, Vnd als die drey täg endhaben, vnd vndernemen sy es nicht, so aygent man den saumendigen berg mit recht dem berg zue den er gehindert hat, vnnd arbeyt Iemandts in einen stolln, mit des rates vnnd pergkmaysters gunst, vnnd khumbt an einen gemessen berg, oder in ein tzeh, vnnd findett lewt darin arbeyttnn, er mag nicht hinderchsich farn, nwr mit irem willen ist aber das sy Ims gwnnen, so soll er farnn eines lachters lang, das Im doch an seinen rechten nicht schadt. Das recht ist alzo was er Inn der tzehenn mit seinen stolln, vber sich gehawen mag, vnd was er des geniesse mag, das behelt er freylich Alzo ob Inn dem vorgenantenn lehenn avgen arbayt ist, Er sitzt auch mitten an dem lehen an das tiefste vnnd was mit einer kratzen oder kheylhawen, vnder sich gehawen mag, das gehört an seinen nwtz, oder die gewerknn desselbigen lehens nwtzund den selbigen stolln, mitsambt im Iedoch so behelt er doch das vierd tayll, der Samkost zue seinem stoleln. Wer ein stoln anhebt, mit des rates oder pergkmayster gwnst, als vor gesprochen ist, Vnnd das ein anderer fur in khumbt, aus der rechtenn maß, vierdhalb lehens durch einen andern stoln oder durch ein schächt, vnnd des ersten erczt findet, das er betzewgen mag, mit fursichtigen dingen. Der erst behelt das man Im syben lehen messenn muß. Vnd ist das in einem berg, oder in einem stollen, an dem hangunden, oder an dem ligunden erczt funden wirt, do man ann tzwyffelt, ob es aus derselbigen lehenmaß sey, oder darin, vnd baydenthalb ein krieg, vnnder den gewerknn ist, Wer das erczt behalten soll, So soll man darzu kysenn, drey erber mannen, die zue kaynem tayll gehörn, vnnd auch nicht tayll mithaben, vnnd denn vierden mon, von des graffenn tayll das die vier mannen ob dem Raasnn, ein winkel maß nehmen, vnd recht besehen ob man den krieg tzwyschen in mug rychten, mag das den nicht gesein So muß man die tzween geng zuehawff farnn mit einem durchschlag vnnd in dem durchschlag, sollen die vier genanten mannen, aber ein winckl maß tzyehen, vnnd sullen sy mit dem rechten außweysen. Alzo soll es dan stett beleiben. Yedoch die das erczt funden haben, vnnd die do gegen Inn arbayten, auch noch der erczt, sullen die weyll vast nach dem erczt werben, vnnd was do gehawen wirt, on bayden tayllen, das soll bleybn ligen zue dem rechten, Inn verpott, vnnd wem es dan zwegesprochenn wirt, von den vier mannen, den soll es volgenn.

§ 48

Auch wo derstick vnnd ertrunkhen tzehenn sind die kein rad noch Gepel geweldigen khann oder gewynnen, vnnd wirt das mit dem erbstolln gewunnen, vnnd will er sein recht darzue haben, das ist alles, das er gewinnt, vnnd trewgt, vnd darzu annemet, das do frey ist, mit sambt der soll, das gibt man im darzue, Vnnd ob yemant darbey pawt, ir seind vill odrr wenig, vnnd ob es der stolln trewgt, so soll man den stolln dienenn mit dem sybennten, als obnn gesprochen ist.

§ 49

<u>Item</u> solst dw wissen wo frey tzechenn sind, vnnd frey lehenschecht, do hat recht ein erb gewerckh vier loch(t)er vnnd ein lehenhewer soll weychen, dem erbgewerkh vierdhalb lachter.

§ 50

Wo tzwen stolln zue hawff khumen, mit durchschlegen, die wern sich mit dreyen viertaylen, eines lochters, das ainer dem andern weychen mwß Vnnd darnach hawet ein yetzlicher wider ann, Vnnd was er gewynnet mit schlegel, vnnd mit eysen, Alzo, das in die maß nicht khan erraychen, der dreyer viertaill, das behelt er mit dem rechten.

§ 51

Wo ein such stolln auffgeschlagen wirt, in eim gantzen berg, der vnverprochen ist, vnnd der findet einen gang, Alzo, das man erkent das er dem lannd nwtz brenngen mag. Es sey silber oder golt, oder annder genng, der selbig stolln soll vngehindert sein, aller schecht halben, vnd soll frey seinn durch alle lehen vnnd genng, gegen dem lehen an schaden, als eines suech stollnn recht ist.

§ 52

<u>Auch wen tzway lehen</u> zu hauff schlagen, in einem freyenn so soll ayner dem andern weychen, drey viertayll aines lochters, vnnd ein yeder wer sich durch mit schlegel, vnnd mit eysen, des besten als er mag vn konn.

Wo ein schacht niderfelt, auff einen flachen gang, wie woll das er nwtz bringt, vnnd khumbt ein anderer auff das hanngungd, vnd weycht im ein lehen, als recht ist, vnnd khumbt ee vnd vndertiefft den, das brengt die flach marschayd, so hat der richtschacht die zoll, vnnd die leg der first Oder khumbt der lege schacht ee das Im sein sayll nachvolgen mag So hat der Richtschacht sein mwe vnd arbeyt verlornn.

§ 54

Auch wo man marscheyd stempfll tzwischenn den lehen legt, oder gelegt werden, vnnd wer die bricht, oder ausslecht, mit frefel, oder mit wissen, der hat leib vnd guett verlorn. Vnnd wen man marscheyd Stempffl legen will, darzue gehorn tzwenn gesworn Burger, vnnd der perckmayster, vnd yeder tayll, soll nyder legenn fur die mue die sy do haben Mer ist zue wissenn wenn man lehenschafft verleycht, Auff einen gewissen tag, die mag man nicht wider nemen fur dem selbigen tag. Ist es aber das ainer die lehenschafft wider haben will, so soll er dem halben tayll gebenn, dem er die lehenschafft verlyhen hatt, der selbigen tayll.

§ 55

Mer haben wir gesetzt, das ein schwrff freyung hab, biß an den dritten tag, vnnd wirt den nicht gepawt, So mag man in vergebenn mit rechte, wer do khumbt, vnnd in begert.

§ 56

Sunderlichen wellen wir, das alle gemayne perckwerch, die durch bewarnuss nicht mogen gepawt werden, das sy fristung mogen erwerben von dem Rate, vnnd dem perkmayster, ye viertzehentag, alzo offt es nott geschicht, vnnd wer das verlast, vnnd sich verleyt, so mag man es ann dem fufftzehendsten tag verleyhen, wer do khumbt vnnd sein begerttt, Ausgenomenn Erbperkwerch vnnd erbstolln, als obgeschribenn stett Vnnd besunderlich von grosser genaden wegen, der heyligen tzeyt, Als zue Osterrn phingstenn, vnnd weinachtenn haben alle vnnd yetzliche perkwerk frey Viertzehentag dar fur, vnnd viertzehen darnach, das man kein pergwerch belegenn mag, das do vor gepawt ist, sunder new pergkwerch mag man alle tzeyt belegenn vnnd ennphaen.

§ 57

<u>Niemand mag eines</u> anndernn tayll verleyhen, wider seinen willn, ist oder, das man verleyhenn will, In einer tzech oder in einem stolln, So soll der pergkmayster denn gewerken zuesamen, auff den berg gepieten auff einen gewissen tag, vnnd das dan alzo verliehen wirt, vnd verschriben das hat krafft Ist oder das die

drey schicht darkemmen, vnd die virde nicht, oder funff achtayll nicht, die vierd schicht noch die funff achtayll, mögen nicht gehinndern, die anndernn mögen sye verleyhenn wem sye wellenn Ist das pergklewt nebenn einannder pawen Es sey, an pergen, stolln, lehenn, oder lehenschächtenn einer mag dem andernn enthawenn vnnd angewynnenn seiner geng, oder seines ertz, des mayste, als er mag, bis das sy gegeneinander durchschlagen. Vnnd so das geschicht, so sollen sy an payden tayllen, von dem durchschlag entweychen, byß das die gesworen vnnd der Perkmayster darzu kwmen, vnnd einen yetzlichenn beschayden, wo er in dem seinen mag arbaytenn an hinderniß.

§ 58

<u>Ist das iemant hwtten</u>, oder Mwllen pawet, auff eines herrn aygn do das perkwerch auffleyt, Es sein halt geystliche, oder weltliche herrn So ist das perkwerchs freyheit, das er keinen tzins do von nemen soll Auch auff welichs herrn aygen pergwerch funden wirt, vnnd gemessen, derselb herr nymbt darvon das dritte tail, der vrbar, vnd was dasselbig pergkwerch holtz bedarff in die grueben, vnd zue allerlay nottorff, das soll vnd mag in derselbig herr mit nichte nicht werenn.

§ 59

Es mag kein man, des andern Geng, noch ertz auff dem berg verpietenn vmb kein geltschult, wenn allein vmb samkost, auch mag, vnd soll keiner dem andern, sein guet in der kamer oder in dem schaydgaden verpieten Item so mag auch kainer dem andern, sein klaid oder anders, das man machen soll verbietenn bey schneydern, Scherern, oder schuesternn.

§ 60

<u>Item</u>, So tzwen schecht, sein auff ainem gangk zwsamen, vnd der Iungest schacht slueg keestnn, oder mawret, so soll man die kesten vnd mewr weg rawmen, vnd darnoch soll dem edelsten schacht sein lehen getzogen werdenn.

§ 61

<u>Es soll</u> noch kan keyner dem andern seinen schacht, oder stollen ablawffen zue heyligen tzeyten nachtigklich oder taglich, es sey durch gantz oder durch prwch Item, es mag keyner dem anndern sein pergkwerch, Es sein schächt oder stolln, durch lawter prwch ablawffen, Wer aber sach das sy durch brwch zuesamen khemen, so soll albeg dem edelsten schacht, sein lehen getzogen werden.

§ 62

<u>Item</u>, so tzween schächt, sein auff einem gang vnd ayner käm durch gantzes ein lochter, es wer auff dem gang, durch fwrsten, oder durch striff, vnd keme dem

andern in sein tzech, vnnd fund nyemant darinnen, vnnd fwr zue dem schacht auß, so bleibt im der schacht mit recht, Funde er oder yemants darinnen, dem soll er des pergkmaysters tzaychn geben, vnnd sol darnach dem eldesten schacht sein lehenn getzogenn werdenn.

§ 63

<u>Item</u> so ein schacht auff geslagen wirt auff einen flachen gang, der do sein lehen hat, vnd ainer schlecht auff, auff das hangend, vnd weycht im auß dem lehen, vnnd sinckt hinab vnd pricht aus in das ligend, vnd sucht den gantz vnd findet den gantz, vnd macht ein loch auff dem lehenschacht, vnd der lehn schacht wer nicht gerecht, so soll man weychen von dem loch drey viertaill, vnd werenn sich darnach mit schlegel vnd mit eysen, So lang, vntz das der lehenschacht gefertigt wirt, vnnd so das geschicht, so soll im der schlag weychen auß seinen lehnn den er auff in getriben hat, vnnd hat hinfur kein recht mehr.

§ 64

Item wie vor bemelt ist, so tzween schecht weren auff einen gang, vnd ainer käm durch gantzes ein lochter, es wer auff dem gang, durch fwrsthnn oder durch striff, vnnd käm dem andern in sein zech vnd fwndt nyemant darinne vnnd fwr zue dem schacht aus, so bleybt im der schacht mit recht do bey sol man merken, so sach wer das einer khäm mit einem schacht herab vnd käm einem in sein zech, vnnd der gang wer hingehawen, vnd nyemannt darinnen, vnnd fur zue dem schacht aus, so bleybt im der schacht gleich so wol, als kam er durch gantzes drey viertl als oben bemelt ist Er soll aber mit sein selbs krafft awß farenn, vnnd nicht mitt fremder hilff.

§ 65

Item nach dem an dem tag ein yeglicher einer dem andern ein lehen weichn soll, alzo das er ein frey lehen hab von einem schacht oder schwrff zue dem andern, Inn solicher maß vnd form soll es in denn grueben vnd zechen auch geschehen, das eynem iglichen ein gericht gestrakt lehen soll gezogen werdenn vnnd ob etlich krwm verhanden werken, die sollen die geschwornnen des rates mit dem pergkmayster abbinkeln vnd absaigern, vnnd darnach ein recht gestrakett lehenn gezogen werdenn.

§ 66

<u>Item</u> als vorbemelt ist, so ein schacht niderfelt auf einen flachen gang wie das er nwtz bringt, vnnd khumbt ein ander auff das hangund, vnnd weycht im ein lehenn als recht ist vnnd kumbt ee, vnd vndertifft den, das bringt die flach marschay, die selb flach marcheyt soll genn durch vnnd ann, so lang biß ein andrer schacht von newem herab khumbt auff den selbigen gang, so soll dan aber geschehen was do recht ist.

<u>Item</u> so ein hangend vnnd ligend schacht auff einen gang zuesamen kemen vnd der hangend schacht het das lehen, So setzt er den ligenden schacht auff alzo ferr als er mit seinem lehen geraichenn mag, erraycht er aber mit seinem lehen denn taben stain, so hat der ligenndt schacht nit weyter zue pawen.

§ 68

<u>Item</u> wo tzween erbstolln zuehawff kömen mit durchschlegen vnd der, der den durchschlag, in den andern stolln gemacht hat, fund nyemant in der zech oder stolln vnnd fur zue dem stollen aus, so bleybt im der stolln mit recht, gleych so wol als ein schacht, wo aber ein schacht khäm mit durchschlegen auff ein stollnn vnnd fur zue dem stolln aus, der mag dem stollen nichts angereymen, der gleichen auch einem suchstolln, dan solch ablawffen ist den stolln anschedlich.

Worterklärung

absaigern	abmessen
abbinkeln	abwinkeln
krwm verhanden	Lehen, die dem Gangverlauf folgen, sollen dem
	Gangverlauf folgend (abgewinkelt) vermessen
	werden, krumme Lehen
schaydgaden	Platz der Erzscheidung
scheyblige lehen	wahrscheinlich unmaßige Lehen im Zusam-
	menhang mit der Überschneidung von Gruben-
	feldern

bearbeitet, korrigiert und in Druck gesetzt: Uwe Jaschik, Dresden, 2024